

Wallensköld

I.

Phelipe, je vous demant
que est devenue amors:
en cest país ne aillors
ne fet nus d'amer senblant.
Trop me merveil durement
por qu'ele demore ensi,
s'ai oï
des dames grant plaint,
et chevalier en font maint.

II.

- Sire, sachiez voirement
qu'amors faut par ameors,
s'en remaint joie et valors
et faillent tornoïement,
si ont corpes mesdisant,
vielles et mauvès mari;
n'est failli
par dames qu'en aint,
mès es chevaliers remaint.

III.

- Phelipe, bien m'i acort
q'il remaint es chevaliers,
mès tout ce fet li dangiers
que dames mainent tant fort.
quant il sont jusqu'a la mort,
lors lor metent achesons.
bon respons
n'i puënt trouver,
s'en font maint desesperer.

IV.

- Sire, il s'en partent a tort
et s'en plaignent volentiers.
Plus lor plect li aaisiers
qu'atendre d'Amors confort,
n'aiment valor ne deport,
ainz tolent et font mesons;
n'est resons:

cil qui veut amer
se doit du tout amender.

V.

- Phelipe, legierement
s'en partent qui poor ont,
que les dames trop leur sont
de sauvage acointement.
Dame doit atrere lent
por melz fere a li baer,
que d'amer
doit dame savoir
por plus faire ami valoir.

VI.

- Sire, trop hastivement
vuelent mès par tout le mont
cil qui amoureux se font
avoir joie entierement,
mès dames a lor talent
doivent lor amis mener.
Endurer
doit on lor voloir
sanz plaindre et sanz decevoir.

VII.

- Phelipe, ami voir
n'en sevent pas le pooir.

VIII.

- Sire, tout pour voir,
dames font le mont valoir.

- letto 410 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/wallensk%C3%B6ld-68>